

乙編人物

卷一名宦 卷二鄉宦

卷三選舉 卷四鄉範

卷五孝友 卷六忠義

卷七善舉 卷八文苑

卷九流寓 卷十列女

黎樹縣志

臧式毅
題



梨樹縣志乙編

人物

凡才能出衆事業超羣而爲地方造福者皆可謂之人物國史鄉志大書而特書之所以資觀感示模範也梨樹葢爾微區雖無聖哲蔚起豪傑崛起而設治百餘年間山川之所鍾毓教化之所涵濡牧是邦者不乏循良生斯土者類多碩彥推之忠孝節義材藝名流堪爲邦國光榮鄉黨儀範者亦代有其人爰錄旣往用勗來茲並附生存以昭激勸焉志人物

卷之四

一、

二、

三、

四、

五、

六、

乙編人物卷二

名宦

自古宰官循良之選莫不稱美召杜龔黃而邦人士或興來暮之歌或勒去思之碑蓋以表欽仰示不忘也本邑自設治以來官斯土者已數十人或開建設之端或著清平之績或提倡教育以振文風或整頓警團以安閭里既政平而人和復化行而俗美允宜不問其平生是否完人苟有一善之長爲人民福利者悉予書之以志賢勞而資觀感俾繼任諸君子知所當務焉

張長泰 湖南靖州人道光十五年及十七年兩任照磨於斯土前後凡十四年維時草萊初闢百政待舉公於任內監修廟宇使人民信仰神道藉以勸善酌定官斗官秤爲商民立交易之準建築太平橋便利交通皆其政績之

卓著者自道光元年設官以來政教粗張實自此始

錢開震 字少如浙江仁和县人光緒四年到任爲升縣治之第一官修縣署作學宮一切規模皆創其手六年正月舉行觀風考試文風一振士喜讀書人皆樂業咸同以來馬賊擾攘之區一變而爲昇平之地時蒙古地局建議達爾罕王請清丈增租憲令擬辦乃力陳情形詞極痛切事遂寢邑人受惠不知也光緒七年補授實缺招集紳商創設天一水會城內火險賴以無虞八年去任及九年復任十年正月商同士紳捐廉創修奉化縣志未竣陞任去後始付梓

黃毓森 字芷靜河南光州進士光緒十二年到任勤政愛民首以激勵文風爲己任爰定官課月試兩次一時生童與考者頗形踴躍公雖案牘勞形而

評定甲乙於文藝較佳之作極力裁成嚴加刪潤以啓迪士子之文思且自捐廉分別給獎以示鼓勵後此奉化

今改黎樹

人文蔚起得舉於鄉者八人皆公

之賜也

劉繼勳 光緒十七年到任前任張瑞三首倡捐輸建修黎城書院以爲敬教勸學之地工未竣卸任去公至落成之並踵勸捐輸以供延聘山長修金及考課應需之費時有存欸發商生息光緒三十二年改辦學堂猶賴其餘資接濟焉

楊澍 字慰三山西丙戌進士光緒十九年到任時馬賊四起公協同邑紳太史桂趙廷瑞等就地籌餉創辦團練請委邑庠生趙彙堂爲練長防捕兼施鄉閭賴以安堵是爲本邑練勇之始

范貴良 字巖蓀順天人光緒二十四年到任正值匪氛未戢仍以團練爲急務其他措施亦多善政

王順存 字理堂河南商城縣舉人光緒二十六年五月到任時值拳匪亂起公以卓識知邪術不可恃力禁之凡拳匪之殺教民燒房宅者悉杖斃之有奉字仁字等軍擬焚教堂公剴切告誡不聽大起衝突公捕隊兵十四人重笞之教堂得以保全教民免遭殺戮和約後未賠巨款者皆公鎮壓之力也時局糜亂馬賊乘勢縱橫潰兵過境肆擾尤甚公先機籌餉練兵躬親督飭擒斬嚴厲莠民咸震懾地方晏然時俄築路華工失業流亡境內者千餘人困窘無生計勢將爲匪公因機應變查知工頭張某有侵吞工餉情事勒令點名發放外罰張某銀六千兩遂集紳商募義捐修築城垣以工代賑派士

紳分段監工。自往勘驗。罔間晝夜。城工已竣。門役未歲八月。公陞遷去。計蒞任僅三月。惠政多多。既舒難於一時。更奠安於永久。民到於今。受其賜也。

鮮俊英 字華甫。回籍廩生。光緒二十六年八月到任。時曾留守。出省人言浮動。文報不通。土匪潰兵縱橫地面。公相機宜。著方略首急。王前任築城未竟之功。嗣有股匪小閭王率黨攻城。公戎服登陴。督飭兵勇嚴守。兩晝夜匪始去。是年冬收編降隊。胡顯廷等爲義勝營。駐扎榆樹台。小城子。啦嗎甸。各鎮。又在縣城操練團勇。名爲警察使。相輔鎮壓四境。以安商民。感其德。釀金建碑於大堂之右。文曰懷德畏威。

陶鶴章 字守芝。光緒三十二年冬到任。翌年整頓警察。改稱巡警。立巡警總局。設總董管轄四鄉分局。經理收捐放餉事宜。是爲本邑起徵畝捐之始。並

接崇前任創立師範傳習所及設立衛生局商務會市面佈置路燈諸凡建設煥然改觀黎邑新政之推行實自公光而大之

陳嘉言 字嘯清安徽廩生光緒三十三年到任公熱心新政事輒躬親了無官氣首政改革房班剔除積弊官民耳目一新且關心民瘼終日坐堂聽訟無倦容其最注重者尤在辦學時本邑學務方萌芽公銳意提倡爲籌學款續辦師範傳習以儲教材又設立勸學所教育會宣講所等機關公餘親蒞講演敦促學務進行未匝月城鄉成立模範小學二十餘處並改良私塾隨時殷殷勸導不憚煩勞學風爲之一變至若改辦罪犯習藝所飭令各區立堡防猶其善政之餘事耳黎邑新政發展之速公其首功焉

戴章勳 字亦雲直隸甯河縣拔貢爲人雍容大雅無急言遽色有儒吏風光

緒三十四年秋到任設警察教練所自治研究所舉辦鄉防實行禁煙凡所措施政令不煩而民不擾尤工書法與其封翁彬元先後媲美縣衙東西轅之門楣即其所書至今邑人珍之

王士仁 字鐵珊山東歷城縣人爲政識體要治盜尤嚴民國二年一月到任首政舉辦預警並設預警講習所旋改預警爲保衛團又因黎境遼闊遇有匪警呼援遲滯設置電話五年七月蒙匪犯境警團防堵未失機宜者賴公預籌電話之力也其勦匪計畫詳見匪患

尹壽松 字秀峰安徽桐城縣人民國九年到任措施咸宜政簡刑清因查縣城商戶多就滿鐵用地內營業舊有城鎮日趨衰落遂設計開放四平街郭家店兩新市場以期振興市面由縣城至四平街舊有官道兩條崎嶇迂遠

公因收買民地改闢新道一條矢直砥平交通稱便並以原有電話杆綫通話太狹歷年入不敷出勢難持久於是擴聯綫於隣封通長途於省會既便於警隊聯防更可以增加收入維持營業於永久又發起官商合資創設電燈市政警政實利賴之鄉鎮各官道橋梁亦無不督飭修整種表道樹置途程標牌鄉村耳目一新縣署文廟年久失修公又別籌專款督同士紳分別修葺工竣立有碑誌公之種種設施有裨益於地方者不少至今猶有口碑焉

吳俊陞 字興權昌圖人光緒二十六年官奉天巡防後路統領駐防昌圖八面城鎮邑境爲其防區拳匪亂後盜賊縱橫地方實倚賴之其勦匪事蹟詳見匪患公在邑兩次立功威震遐邇人民受惠非淺

張景惠 字叙五台安人民國五年夏蒙匪巴保加布率黨二千餘人竄至三區郭家店公在二十七師馬二十七團團長任內擢爲勦匪司令督飭奉吉各軍警指揮捕滅並陣斃匪礮官某以寒匪膽地方轉危爲安邑人立碑以頌其功

郎官普 字菊辰新民人民國八年冬任奉天清鄉局北路正承審官蒞本邑延洽士紳廣寄耳目傳爪牙於警團每鞠案犯必先搜證後質供以杜其狡有所扳咬非經密查得實不輕株連留黎不踰月而懲治著匪孫雙九等十餘犯皆爲地方警團所無可如何者由是地方以靖商民安堵者數年

曲麟兮 字道堂復縣人民國八年長本邑警政兼任黎懷清鄉調查員舉辦清查戶口互保連坐不遺餘力緝獲匿盜數十起搜出贓槍百餘枝奸究潛

蹤匪根淨盡其成績洵爲歷任所弗及

于芷山 字瀾波台安人民國十三年巨匪仁義軍二千餘人由濛江竄至奉吉省境匪首同樂等四百餘人盤據黎懷兩縣大肆蹂躪公奉令督勦率武團長中原晝夜兼程趕至五區王家藥舖與匪接仗擒斃過半追至懷德老岔屯一戰肅清邑人感荷立碑以誌紀念

董懷清 字靜泉遼陽人民國十八年中原擾攘地方不靖公爲黎懷一帶勦匪司令坐鎮黎城指揮部屬團長田朝鳳營長趙雷皆盡力勦捕以靖地方其尤著者在桑樹崗子八面城北兩役殲匪四五十名無倖逃者匪氛因之頓熄商民感戴恭送旗匾留去後思

乙編人物卷二

鄉宦

士大夫處則敦品勵行出則利民福國其盛德豐功得以勒金石而被絃歌者雖邦家之光亦閭里之榮也黎樹闢土聚民有年矣政教兼施人文蔚起科舉時代擢高科而登顯宦者不乏真才共和而後爲國干城立功邊徼者尤多志士餘如懷抱利器韜光於末秩身著德行矜式乎後進者亦大有人在所造地位雖有不同其爲社會之名流負一邑之清望則一也人傑地靈地以人傳烏可湮沒而不彰茲踵舊志附錄新進依序列用示觀摩生存者之論定雖俟將來而亦紀其姓氏出身俾後輯志者有所徵焉

文職

鄭福德 九區啦嗎甸人以吏員任直隸永清縣典史光緒五年資遣流民十

年永定河安瀾兩次出力疊蒙保荐奉旨以縣丞升用並賞戴藍翎加五品銜其兄候選巡檢福全其姪候選州同澤鈞均爲本邑登仕版者之先聲也

常蔭廷 字括襄八區劉家館子人聰敏嗜學弱冠擢黌序光緒甲午舉於鄉

宣統二年補授江省青岡知縣旋調綏化縣兩邑素稱盜藪蒞任即首政治

盜簡官警練鄉團擇用蒙旗勇士懷塔喜統帶游擊專任捕盜責旬月間而

盜魁杜永勝劉大虎等均偵獲伏誅地方以靖於是課農商興學校立社倉

備荒歲籌畫咸宜而於訟獄尤慎重命案有潘姓者房主人王甲失馬潘追

之死於途里人信爲盜殺之據報按狀疑有詭親臨勘驗當場訊究審得殺

潘者即王甲也蓋王甲素與潘妻有姦故搆成此案人咸歎服稱曰常青天

官綏十餘年政聲藉藉壬戌擢綏蘭道尹仍以緝盜安民爲要政乙丑調龍江道尹旋任黑龍江省交涉署長丁卯轉呼海齊克兩路總辦逾年路工告成辭職時年五十九卒於甲戌年六十有五歲

常蔭槐 字瀚襄歷任奉天軍警執法處長清鄉督辦京奉路局局長交通部部長瀋海路督辦東三省交通委員會副委員長黑龍江省政府主席

常炳彝 字紹襄官至濱江關監督調任河北省政府委員兼農礦廳長現充山西省政府委員兼實業廳長

常焜彝 字紹書現任中東路督辦公署秘書

李彭年 字鏡周一區娘娘廟人歷充奉天軍警執法處副處長京奉路駐奉辦公處處長黑龍江龍江道尹

董壽彭 字紹庵三區雙廟子人曾任懷柔縣知事綏遠實業廳長現充東省

特別區市政管理局副局長

張鴻聲 字譽久伊通人遷居黎樹城內曾充河防委員補山東沂州府經歷

維時錫帥爲州守察吏嚴數責公以吏事卒無間錫心折由是受知焉及錫來督東始調奉委督撫兩轅文巡捕保知縣升用知州旋隨錫調熱河署赤

峯直隸州赤峯盜悍號難治擇官無敢往者公到任練勇五百未一月即擒

匪首小白龍鐵頭僧宣於法報不俟命竟斬之痛剿餘匪年餘斬匪九十七

人赤峯役弊重莫可究詰公禁其勒索役糾數百人同時請假公悉其詐悉

收之將鞫狀上聞羣出乞哀乃解積弊以除公因斬小白龍等盜結怨於蒙

旗翁牛特王王糾劣紳騰蜚京師國務院遂劾都統崑源併及公迫崑以全